

四川大學古籍整理研究所編

儒藏

史部
第三十八冊

四川大學出版社



四川大學古籍整理研究所 編

儒藏·史部

儒林碑傳

第二冊

四川大學出版社 二〇〇五年



目録

隋唐五代儒林碑傳集 二(卷四一至卷六〇)	楊玲 校點 李文澤 郭齊 審稿	一
宋儒碑傳集 一(卷一至卷二二)	李勇先 校點 刁忠民 吳洪澤 審稿	三二九

隋唐五代儒林碑傳集卷四十一

馬盧符 齊抗 胡珣 閻士熊 鄭儋

顧少連 韋夏卿 崔淙

秘書少監史館修撰馬君墓誌

公諱某、字盧符、宣州刺史元慶之曾孫、著作郎贈少府監恬之子。公九歲貫涉經史、魯山令元德秀行高一時、公往師焉。魯山令奇之、號公爲馬孺子、爲之著神聰贊、由是名聞。中書令郭公子儀奏爲懷州參軍、充四鎮伊西庭節度巡官、從事河陽三城、河東三府、累轉試大府丞、因得太原府倉曹。黜陟使裴伯言謂公堪爲諫官、薦之於朝、拜殿中侍御史、充昭義軍節度參謀。召爲太子左贊善大夫、遷主客員外郎、使於海東。復命、授興元少尹。人爲將作少監、改國子司業、遷秘書少監、又加史館修撰。元和十三年十一月己酉、寢疾卒。公博覽多藝、奕棋居第三品。家貧未嘗問生業、祇以纂錄自樂。

爲事、撰歷代紀錄類史、鳳池錄、纂寶、折桂錄、新羅紀行、將相別傳、及所爲文、總四百八十八卷。年登八十、官貳秘書、職領太史、雖不極於富貴、亦儒者之難及也。夫人潁川陳氏、贈潁川郡君、先公終三十年餘矣。有子七人、曰文則、由進士補錢塘尉。第二、第四子文範並早卒。曰文同、曰文約、讀書著文、有名於進士場。曰文輿、曰溪郎、皆恭守家法。女五人、其存者三人、未笄。文同等奉公之喪、以明年二月祔葬於偃師、從先塋。謂翱嘗從於史氏之列、來請爲志。

李翱撰 《全唐文》卷六三九

唐故中書侍郎同中書門下平章事太子

賓客贈戶部尚書齊成公神道碑銘并序

有唐文學政事之君子、曰相國齊成公諱抗字遐舉。清方粹溫、絜矩秉懿、明誠盡性、切磨化育之道。精義入神、旁魄天人之際。以忠事君、以病乞身、乃



去台宰、乃儕商皓。然後徹琴瑟、啓手足、歿齒無違德、以從先大夫於九原。易名曰成、不亦宜乎。公定州義豐人。自太公表東海、桓公匡天下、爲國爲家、或哲或仁。烈祖贈太師府君諱瀚、歷給事中、中書舍人、吏部侍郎、止於平陽太守。出入陟降、中行山立、至今言開元名臣者、稱公有遺直遺愛焉。實生先公贈國子祭酒府君諱翽、履道貞厲、仕至左龍武軍倉曹。積厚於上、流光於下、其位不充、故大受於成公。公既齷而孤、哀過成人、屬幽陵橫潰、中夏如毀、奉太夫人安輿、違難於越、得子州支伯之故地而偕隱焉。誅草茅以順居息、悅山水以資仁智、方茂天爵、用觀靈龜。嘉招重問、奔走以狎至。虛己宏道、從容而翔集。吳郡張相君鑑、方以仁義理濠上、得君爲榮。及進律於洪、成師於岐、累爲命介、若驂有靳。建中中、戎王謀大和會、以休寧西方。右扶風綿亘汧隴、地當甌脫、且有成命、正其經界。公實

佐中權、登壇莅盟、得其情數、與之約結、克就衣裳之會、用銷邊鄙之警。自解巾三遷至殿中侍御史、俄屬涇旅竊發、群凶挺災、天兵展義於旬內、王公死難於理所。百舍奔問、至於行宮、拜侍御史、有詔以蕭黃門復布愷澤於東夏、命公爲工部員外郎以贊焉。復命轉倉部郎中。李懷光阻命於蒲、連兵未解、關中饑旱、經費不足、轉粟饋軍、濟時之艱患、求才急病、命使以轉達、遷兵部郎中兼御史中丞、以董其任。俄拜諫議大夫。當軸者不相容、坐婚親細故、出爲處州刺史。先是山越寇攘、蕩覆城寺。公乃卜勢勝之爽塏、因習俗之便安、三時不害、百堵皆作、朝典陟明、拜蘇州刺史。吳實劇部、大田多稼、浮徭冒役、吏禁或弛、占著名數、戶版不均。公乃閱其生齒、書其比要、强家大猾、不得蓋藏、公持單輕與之紓息。已日乃孚、厥猷茂焉。遷潭州刺史、御史中丞、湖南觀察使。以嚮時二郡之理而宏大之、其



仁可知也。左曹理本、徵爲給事中。周郊寄重、擢爲河南尹。盜有宋瞿曇者、白晝椎剽、爲郡偷囊橐。三川病之、幾三十年。公法令嚴具、網絡張設、名捕魁宿、使無遺類。指顧之間、擒擿如神。乃作秘書、章明文雅、修舊以起廢。乃作太常、統和神人、節事以辨志。便蕃大僚、其道乃光。德宗皇帝方以堯舜氏聰明之道馭天下、用賢人充相位、拜中書侍郎同中書門下平章事。熙九功之歌、質百官之成、損益文獻、化裁形器、精微以折衷、密靜而不伐、或事隱於造膝、或言行於沃心。初、天官氏每歲表他曹郎二人、閱多士試言、第其甲乙。春、官氏俾考功郎選孝秀之親故者而進退之。公以冢宰少宗伯爲官人取士之本、蓋天子有司之重寄。至於避小嫌、亂舊章、適滋旁岐、孰謂肩鏑蹇蹇坦坦之道、豈如是耶。然後闢康莊、作衡尺、遵公是之路、去自便之私。天下之人、謂之理道、尋有詔修國史。昔孔父無位、以

空文爲一王法、公當盛聖之代、用宰司總直筆、其於褒貶、勸懼明焉。勤慮盡瘁、積成寢恙、累章乞告、改太子賓客、遭罹不淑、贈戶部尚書。時貞元甲申歲夏四月、春秋六十有五。夫人河南獨孤氏、某官某之女、賢明蚤夭。繼夫人蘭陵蕭氏、某官某之女、仁順有禮法。嗣子餗、銜恤毀瘠、侍公裳帷。以某月日、祔於東都某原、喪祭哀敬。君子以爲有後。惟公深而通、肅而寬、出處動靜、必以中正。敬用五事、暢於四支、資性儼恪、尤長鑒裁。在岐也、薦齊忠公映佐蕭也、薦盧恭公邁、皆至丞相。其他推轂下士、爲朝廷臣、成天下重名碩望者、不可勝書。凡所論著、皆研幾析理、宏雅夷遠。洪州文宣王廟碑、張蕭盧三相國碑誌、本聖人教化之迹、推大政、晷明之道、固其性術講貫、而發舒乎斯文。文集二十卷、中倫體要、盡在是矣。公薨五年、餗調爲洛陽尉、永惟先烈、未刻豐碑。以德輿夙承湖海之舊、中忝掖垣之

屬他日舉代靡形話言。獲於遺編、實見陰德。顧茲無似、有玷知人。濡涕含毫、以表幽宅。銘曰、

昔在營丘、大風泱泱。有倬平陽、令聲章章。不踐宰政、貽慶子姓。倉曹含光、太學追命。厥生中書、秉哲居正。鵬起扶搖、鸞翔慶霄。乃登紫微、以瑞清朝。吉凶糾纏、寒暑結轡。其生有涯、其用無極。壽堂冥漠、冢樹森植。楊茲馨香、終古是式。

權德輿撰 《全唐文》卷四九九

唐故中散大夫少府監胡良公墓神道碑

少府監胡公者、諱珣、字潤博、年七十九、以官卒。明年八月十四日、葬京兆奉先、夫人天水趙氏祔焉。其子逞、迺巡、遇、述、遷、造與公婿廣文博士吳郡張籍、以公之族出行治、歷官、壽年爲書、使人自京師南走八千里、至閩南兩越之界上、請爲公銘刻之。墓碑於潮州刺史韓愈、曰、胡姓本出安定、後徙清河、於今爲宗城、屬貝州。大父諱秀、武后時以文材

徵爲麟臺正字。父宰臣、用進士卒官平陽冀氏令、贈潭州大都督。公早孤、能自勸學、立節概、非其身力、不以衣食。凡一試進士、二即吏部選、皆以文章占上第。樂爲儉勤、自刻削、不干人、以矯時弊。及爲富平尉、一府稱其斷決。建中四年、侍郎趙贊爲度支使、薦公爲監察御史、主饋給渭橋、以東軍洗手奉職、不以一錢假人。賊平、有司考核群吏、多坐貶死。獨公以清苦能檢飭、無漏失、遷河南倉曹。魏公賈耽以節鎮鄭滑、以公佐觀察、事檢校尚書工部員外郎。以剛直齟齬不阿、忤權貴、除獻陵令。居陵下七年、市置田宅、務種樹爲業、以自給、教授子弟。貞元十一年、吏部大選、以公考選人藝學、以勞遷奉先令、以治辦遷尚書膳部郎中、改坊州刺史。州經亂、無孔子廟、公至則命築宮、造祭器、率博士生講讀、以時、如法以祠。人吏聚觀嘆息。遷舒州刺史、州歲大熟、麥一莖數穗、閭里歌舞之。考功以聞、遷



尚書駕部郎中。數以事犯尚書李巽。巽時主鹽鐵事。富驕恃勢。以語丞相。由是退公爲鳳翔少尹。巽死。遷少大理。改少詹事。元和十二年。朝廷以公年老能自祗力。事職不懈。可嘉。拜少府監。兼知內中。尚。明年以病卒。公始以進士孤身旅長安。致官九卿。爲大家。七子皆有學守。女嫁名人。年幾八十。堅悍不衰。事可傳載。可爲成德。銘曰。

揭揭胡公。既果以方。挾藝射科。每發如望。人求於人。我已爲之。自始迄終。不降色辭。因官立事。隨有可載。發迹饋軍。遭讒府介。去居陵下。爲吏爲隱。坊舒之政。於茲有靳。守官駕部。名升已屈。躋於少府。甚宜秩物。不配其有。君子耻之。少府古卿。公優止之。刻文碑石。以顯公行。維公後人。無怠嗣慶。

韓愈撰 《全唐文》卷五六二

唐故宋州宋城縣尉河南閭公墓誌銘并序

公諱士熊。茂族承家。河南縣人也。考勛。邢州南和

縣令。公弱冠明經出身。解褐綏州大斌縣丞。公之仕也。屬幽將叛恩。天兵討逆。熊羆忠勇。所在雲屯。芻糗徵輸。實惟山積。公佐議不擾。當繁必濟。由是朔方節度天下副元帥郭公知之。奏授隰州司田參軍。酬吏用也。秩滿。調授亳州鄆縣尉。時相國劉公總戎鎮汴。天子以宋毫隸。供備資糧。公清白之規。忠貞之量。處下奉上。無隱無虧。劉公躋之。特奏改宋州襄邑縣尉。復奏轉宋城尉。以爲鴻鵠之資。必飛千里。豈期溟鯤未化。長逝九泉。以貞元六年六月九日終疾於官舍。年五十。夫人清河張氏。柔和蘊德。慈撫纏哀。公有息男四。息女三。長曰聿。太常寺奉禮郎。皆淚血崩心。懼禮存性。號護自宋。歸卜於周。以十一月十日安厝於洛陽縣平陰鄉呂樂里都城之隅。近親姨塋前西之右。蒼龜告勝也。銘貞石永誌幽泉。銘曰。

邙山之趾。洛邑之隅。龍蛇伏崗。水陸前衢。蒼龜協

告封樹攸圖、猗明靈兮永此、與厚地兮長俱。

喬融撰 《唐代墓誌集編》貞元〇三二

河東節度觀察使滎陽鄭公神道碑文

河東節度使贈尚書右僕射鄭公葬在滎陽索上、元和八年六月庚子、太史尚書比部郎中護軍韓愈刻其墓碑曰、司馬氏遷江南、有鄭豁者、仕慕容垂國、爲其太子少保。其孫簡、當拓跋魏爲滎陽太守。後簡者號其族爲南祖。南祖之鄭、入唐有爲利之景谷令者曰嘉範、於公爲曾祖。是生撫俗、爲泗之徐城令。徐城生公之父曰洪、卒官涼之戶曹參軍。公諱儋、少依母家隴西李氏、舉止異凡兒、其舅吏部侍郎季卿謂其必能再立鄭氏。稍長、能自課學、明左氏春秋、以進士選爲太原參軍事。對直言策、拜京兆高陵尉。考府之進士、能第上下以實不奸。樊僕射澤以襄陽兵戰淮西、公以參謀留府、能任後事。戶曹殯於涼、涼地人西戎、自景谷、徐城三

世皆未還滎陽葬。公解官、舉五喪爲三墓、葬索東徐城。墓無表、公能幼長哀感、心求不置、以得舊人指告其處。其後爲大理丞、太常博士、遷起居郎、尚書司封、吏部二郎中、能官舉其名。德宗晚節、儲將於其軍、以公爲河東軍司馬、能以無心處嫌間、卒用有就。貞元十六年、將說死、即詔授司馬節、節度河東軍、除其官爲工部尚書、太原尹、兼御史大夫、北都留守。公之爲司馬、用寬廉平正、得吏士心。及升大帥、持是道不變。部將有因貴人求要職者、公不用、用老而有功、無勢而遠者。削四鄰之交、賄省媵、嬉之大燕。校講民事、施罷不俟日、用能以十月成政、氓徵就寬、軍給以饒。十七年、疾廢朝夕、八月庚戌薨、享年六十一。天子爲之不能臨朝者三日、贈尚書右僕射。即以其年十月辛卯葬索上。疾比薨、醫問交道、比葬、吊贈賜使者相及。凡河東軍之士、與太原之氓吏、及旁九郡百邑之鰥寡、外夷狄



儒藏

之統於府者、聞公之薨、皆哭曰、吾其如何。公與賓客朋游、飲酒必極醉、投壺博奕、窮日夜、若樂而不厭者。平居簾閣據几、終日不知有人、別自號白雲翁。名人魁士、鮮不與善、好樂後進、及門接引、皆有恩意。始娶范陽盧氏女、生仁本、仁約、仁載、皆有文行。二季舉進士、皆早死。仁本爲後子、獨存、不樂舉選、年三十餘始佐河陽軍。後娶趙郡李氏、生三女。二夫人凡三男五女、長女嫁遼東李繁、繁亦名臣子、有才學。遺命二夫人各別爲墓、不合葬。系曰、士常患勢卑、不能推功德及人。常患貧、無以奉所欲得。若鄭公者、勤一生以得其位、而曾不得須臾有焉。雖然、觀其所既立、其可知己。嗚呼哀哉。

韓愈撰 《全唐文》卷五六二

東都留守顧公神道碑

昔康王以成周之衆、命畢公保釐東郊、承二后之業、周禮以天官卿爲冢宰、漢以大司馬爲將相、國

朝以尚書僕射師長百揆、此四者、人臣之極、公盡更之、有不至、追而命之、公之德盛矣。公諱少連、字夷仲、吳郡人也。夏后少康以禹葬會稽、次子爲越王、以主祀、漢封其裔孫爲顧侯、續禹之緒。厥後、葛蔓世居河南、中原戰爭、復徙吳會、自晉司空和洎梁給事中耀、至公十三代矣。衣冠禮樂、爲江左著族。曾王父諱君卿、晉朝柳州司馬。大父諱克忠、縉雲郡司倉參軍、贈邠州刺史。烈考諱望、贈秘書監。秘書府君慕梁伯鸞於陵仲子、安貞履道、不辱其身、該通六經、旁貫百代、究天人之際、盡性命之端。公蘊山岳粹靈、承祖考休慶、環姿偉度、識達行方、志存遠大、道契先覺。每躬率耕稼、厲精墳典、齒列上庠、升堂睹奧。時小宗伯薛公邕、深所嘆異、以爲東南之美盡在、廊廟之器不孤、擢進士甲科、猶謝詩人錯薪之義、丁秘書府君憂、居喪柴毀、殆至滅性、既祥而哀未忘也。久之、以書判高第、典校秘文、

秩滿授登封主簿、時議以皇居在鎬、砥名之士登近甸者、俗不爲東畿、殊不知樂嵩少之游、奮鴻鵠之翼、先是邑有暴虎、公以爲天道可以誠感、猛鷲可以仁服、乃堙塞陷穽、移檄靈岳、於是人安其居、獸不爲害、其通理遂性也如是。及休告東洛、居守鄭公叔則辟爲從事、非其所好、終以疾辭。其明年書判超絕登第、亞相于公頌推義行、詔拜監察御史。京師內亂、鑾輅時巡、公節見艱危、步至行在、陳少康滅澆之計、墨翟設拒之宜、帝納其忠、拜水部員外郎翰林學士。隨難南梁、遷禮部郎中、加朱紱銀綬、學士如故。贊絲綸之密命、參帷幄之謀猷、屢獻嘉言、克昌大業、乘輿反正、酬勞計功、退保謙冲、口不言祿。以東吳播越、叶於方墓、表求遷奉、辭志哀懇、德宗以公職在近署、重違其請、乃命長男主喪、中使監護、水陸縣道斂襚之飾、悉令仰給、葬於偃師縣高邑鄉邛山之趾、澤漏泉壤、哀榮莫儔。尋

以本官知制誥、賜金印紫綬、遷中書舍人、公在翰林、僅將一紀、富平以周密自制、萬石以謹審見稱、故造辟而言、詭辭而出、讜言碩畫、人莫得聞、帝深嘉之、方將大任、以文昌理本、歷試其能。凡三踐列曹、再登八座、一爲散騎常侍、一爲左丞、雖分職各殊、領者數矣。公之在地官也、辨土地之名物、稽夫家之衆寡、四人不瀆、五教允敷、斂施以時、貴賤以節、所以法通制而濟經費也。公在秩宗、明典禮以正威儀、變樂府而和上下、錯綜經術、辨論俊造、黜浮僞而尚敦素、所以觀人文而化天下也。公在天官、綜六典以佐邦理、糾八柄以馭群司、登降庸勛、權衡流品、抑貪冒而進賢能、所以代天工而立人極也。珥貂騎省、以直方備顧問、以謇諤處朋儕、時有權臣怙寵、人多附麗、公面折其短、數而絕之、群臣爲危、正色不撓、旋持左轄、旁總機曹之事、凡三典賓貢、三掌銓衡、藻鑒表於知人、清通播於令問、



萬邦輻輳、五都浩穰。命公尹京兆、以爲設鈎距、塗
赭衣、前人之所爲、不足以爲四海式。於是布和平、
尚簡易、始務仁人之惠、無取赫赫之名、政宏大體、
去有餘慕。遷吏部尚書、復行太宰之職、轉兵部尚
書兼御史大夫、東都留守。處納言之位、儀亞相之
府、行二南之化、申九伐之威。以洛苑閒田、汝墳曠
土、乞田積粟、務穡勸分、貞我律師、載清東夏。孟元

陽有激水之功、爲當時所揜、公密薦於先帝、言雖
不成、識者美之。嗚呼、昭假其功、馨香其德、宜升玉
鉉而底太階。天不憖遺、梁木斯壞、以貞元癸未年
十月四日、薨於洛陽崇讓里之私第、春秋六十三。
都人罷市而灑泣、皇上廢朝以興悼。乃命有司、葬
日給鹵簿、簫鼓、追贈尚書右僕射、飾終之義備矣。
太常考行、謚曰敬。夫人同郡陸氏、常州司馬綺之
女也、蘊中饋內弼之美、女儀之德、宜配君子、光我
閨門、石窞未封、先公而謝。有子曰師閔、克家光烈、

早歲繼明、以拔萃甲科、歷咸陽尉。次曰師安、太常
寺太祝。次曰宗彧、宗憲、志文、好學、不墜先業、凱風
之思、有感人聲。師閔等考卜先遠、以明年二月十
五日、奉公泊夫人之裳帷、合葬於亳邑、附先塋、禮
也。以黃裳陪南宮之班列、接西掖之周行、忝於史
官、頗知系錄、叙事詢於故老、銘德存於碩儒、追琢
豐碑、永播徽烈。

杜黃裳撰 《全唐文》卷四八七

東都留守顧公神道碑銘

洪維哲人、含道研幾。大方不器、正得思惟。磅礴山
立、危昂鳳姿。耽耽廣廈、浩浩澄陂。元化及物、聖主
爲時。嘉猷式贊、密誥是司。十餘年間、造膝詭辭。顯
仁藏用、孰得而知。天地有公、輔相其宜。綜綱清轄、
揭禮高闈。貂蟬峨峨、親侍玉墀。帝思其人、則曰汝
爲。乃齊九賦、乃張四維。清濁是分、集於靈囀。祈祈
名士、天下觀頤。正直摧剛、誠明滅私。孰云強禦、視

若嬰兒。量人氣折。觸角用贏。因智圖難。尹正邦畿。無念鰥寡。克宣明夷。尼父有言。栽者培之。於赫斗樞。迭爲官師。重光疊耀。近古攸希。分政於東。宏訓保釐。方俟元宰。聿來膺斯。嗚呼不淑。棟幹其萎。神昧於仁。胡可度思。寵贈端右。恩覃澤垂。元宇深邃。龍光逶迤。德音孔昭。視我豐碑。

韋夏卿撰 《全唐文》卷四三八

故太子少保贈尚書左僕射京兆韋府君

神道碑

山之大者、匿峰巒、含氣象、積高無倪、而不見其險、孕粹有物、如不知其神、此其所以爲大也。德之全者、毀圭方、黜皎厲、靈機密運、而智不驚愚、遐標特立、而迹無變俗、此其所以爲全也。然則泰山高而可陟、全德近而難知、我求其倫、見之於少保公矣。公諱某、字某、京兆杜陵人。其先帝堯光宅、讓德儲慶、建國命氏、列於夏商、相胄卿族、繁於漢魏、代濟

不殞、煥焉盛門。大王父諱某、皇朝主客郎中萊、濟商三州刺史。王父諱某、倉部郎中太原少尹、贈秘書監。烈考諱某、檢校都官郎中嶺南節度行軍司馬、贈同州刺史。或以瑚璉之器、才施郡政。或以巖廊之姿、僅及戎佐。與時俱息、從道而污、屈不試於當年、啓莫京於身後。公生而岐嶷、弱而老成、渾粹不散、清明虛映。朱弦遺音、而官商自韻。大圭不琢、而符彩溢發。邈矣天爵、爛乎人文。鼓鐘之聲日遠、鄉曲之譽來逼。釋褐太子正字、與仲弟正卿以賢良偕徵、策入異等、冥鴻雙舉、當代榮之。授高陵主簿、遷監察御史、改殿中內供奉、東都留守判官、即拜東臺殿中侍御史。參畫惟允、持繩不回、河洛之間、風聲尚在。德宗躬決庶政、本於尚書、責成曹郎、綜練材實、薦出方伯。時超貳卿、二十年間、斯爲極選。公由是前後遷刑部、吏部員外郎、吏部郎中、奏議推美、彌綸成績、南宮之故事存焉。於時戡復日



近、勛勤者衆、都市惰游、盡垂金組、邦畿豪奪、半賜丹書、輕禽逸於疏網、悍馬駭於柔轡、上思懲抑、必假良能、公由是前後歷奉天、長安二縣令、仁護鰥嫠、智鈴豪右、輿人之道咏在焉、望由實濟、任以望重、選曹未幾、遷給事中、既居駁正之司、不撓當官之論、屬東南歲歉、俾乂惟難、出爲常州刺史、天寶之後、中原釋耒、輦越而衣、漕吳而食、一隅重困、五紀於茲、公臨之清貞、結以忠恕、固存惠寡、務奮勤分、一法以去其侵漁、多方以備其灾患、以逸道而使繕完允濟、以與道而取賦入先期、聲聞天朝、考績連最、轉蘇州刺史、二境之間、百里而近、靈源自出、殊派共清、膏澤所沾、異壤同潤、下車期月、報政如初、加秩賜金、借留累歲、無何、彭沛喪師、兵驕地逼、安危所繫、朝論難之、乃以公檢校秘書監兼御史中丞、賜紫金魚袋、充徐泗節度行軍司馬、重其威望、將委旄鉞、而未命程伯、徐方之軌既同、不見

賈生宣室之徵遽至、擢吏部侍郎、倫品甄明、通簡節適、勢有探湯之熱、我以靜濯、衆有鼓簧之喧、我以心聽、馴致其美、暗然日彰、不求無失職之人、人自以爲不失職矣、輟拜京兆尹、德刑交修、寬猛相濟、匪設鈎距、物無遁情、匪曜鋒鋌、機無滯斷、浩穰之理、不肅而成、不求無不欺之吏、吏自以爲不能欺矣、俄改太子賓客、辭劇就閑、圖南之勢一息、選德求舊、居東之命惟重、遷檢校工部尚書兼御史大夫、充東都留守、東都畿汝州都防禦使、自盜起幽陵、兵屯諸夏、涉淮而北、軍國異容、分陝以東、古今殊寄、公講信修睦、外張保釐之政、完備訓戎、內寓折冲之令、矛戟不露、德耀藹然、遐邇頓首以承風、強暴革心而知懼、今上嗣統、就加檢校吏部尚書、方人諸僉屬、毗贊大化、不幸嬰疾、表求退頤、優詔除太子少保、冀其休復、將有後命、神祇竟昧、藥禱無真、以元和元年三月十二日、薨於東都履信

里之私第、享年六十有四。寵贈尚書左僕射、輜車西歸。制使賻弔、太常褒議、謚曰某公、哀榮備矣。夫人河東裴氏、侍中耀卿之孫、給事中皋之女、德門鍾美、淑問充塞、薜華早落、蓍兆叶期、即以是年五月二十一日、合葬於萬年縣高平鄉少陵原、禮也。公孝悌天至、行有餘力、仁義性德、匪俟服膺、不飾表以近明、每縱心如中矩、清虛簡淡、而應物不倦。通曠夷易、而及門無雜、不尚意氣、而然諾篤志、不好臧否、而鑒識超倫。與故相國齊江西映、穆宣州贊、贊弟侍御史員爲文章道義之友、可以視其所親矣。今吏部郎中扶風竇群、抗迹毗陵、退身進道、公三揖郡榻之上、一振天墀之下、不數歲間、蔚爲重器、可以視其所與矣。分正東郊、開府闢土、則有今右司郎中燉煌段平仲、倉部員外郎安定皇甫鏞、禮部員外郎清河張賈、洎京兆尹韋詞、隴西李景儉、中山衛中行、平陽路隨、皆群彥之秀出、一時

之高選、可以觀其所任矣。加以志尚幽遠、冥搜好古、所居第必有松石之致、退公暇日、常以圖籍自娛、一字愜心、金玉不顧、片言同趣、布褐無間、簞簞然若見道之所存、陶陶然不知歲之云晏。於戲、策名從事、四十餘年、朋友罕聞得喪之言、家人莫見喜愠之色、坦懷以處、推分而行、無怨於人、人亦無怨、無猜於物、物亦無猜、履信順以優游、保福祿而終始、其名教之大雅者歟。有九子、長曰元質、前常州義興縣尉。次曰穀、前邠州司倉。次曰璋、鄉貢進士。能修詞立誠、克家致美、茂揚風訓、休有令聞。其次某某、皆殊資異識、登於童齡、慶善之餘也。以某獲窺墻仞、見托篆述、究賢人之業、信而無愧、申孝子之志、直而不文。其詞曰、

利建於商、介圭作寶。爰立於漢、緇衣改造。克昌厥允、奕世載考。亞尹擅名、郎中懷道。莫躋貴仕、莫享難老。蘊靈儲休、以啓少保。丕顯少保、其德懋懋。有



綽遐姿、曠哉靈襟。顯仁山立、藏用淵沈。煦如冬陽、藹若春陰。白圭三復、克保明心。黃鐘九變、莫匪和音。靜專動直、謙進柔克。宜踐公輔、以楨王國。促路頓軌、中天墮翼。少陵右原、拱樹寒色。窮壤可敝、唯名不失。金石垂之、以慰罔極。

呂溫撰 《全唐文》卷六三〇

銀青光祿大夫守工部尚書致仕上柱國

中山郡開國公食邑二千戶贈陝州大

都督博陵崔公行狀

唐故銀青光祿大夫守工部尚書致仕上柱國中
山郡開國公食邑二千戶贈陝州大都督博陵崔
公曾祖諱承福、皇朝太中大夫、廣越二府都督、祖
諱先意、皇朝朝議大夫、鄧州刺史、父諱獻、皇朝朝
議大夫、鄭州長史、贈左散騎常侍、狀斧藻天理、立
爲人極、敬終端本、彼所以將就誠明、褒歿勸存、此
所以砥礪名教、然而以道行己、晦而彌光、大君子

之行也。以法考行、直而無黨、賢有司之職也。且曰
獻狀、則惟所知。公諱淙、清臧而和、博厚而敏、岐嶷
而夙茂、羈帛而老成、情約性充、靜專動直、出入孝
悌、周旋忠信。始以經明上第、調佐夏陽。次以詞麗
甲科、超尉王屋。事迫於官而舉、言迫於事而揚、欲
藏智而蒙滯來求、不近名而聲華見逼。故相左僕
射張公時尹洛京、首得才實、泊鎮荆蜀、致於幕庭。
再兼理官、專領記室、捷筆良畫、三邦有聞。旋遭內
艱、毀瘠僅立、善居得禮、族黨稱之。免喪之歲、天子
南狩、大尉西平王大會兵車、將圖匡復。公首膺辟
命、濬發義心、琴未成聲、屢及於路、感激而將星芒
怒、謀謨而兵侵廓清。翠華既還、優典斯及、拜殿中
侍御史。時有寵臣爲京兆者、政以暴聞、吏有冤弊、
公表陳枉直、伏閣待旦、言忠主悟、事寢風生。以繩
違稱職、轉侍御史、以求瘼慎選、爲華原令。大兵之
後、早歲爲虐、公勞徠不倦、弛張以宜、復流庸於潤

屋闢曠土爲多稼。俄改歙州刺史。地雜甌駱。號爲難理。下車而簡其約束。期月而明其信誓。然後破散谿聚。剪鋤山豪。既去害群之奸。遂寧挺險之俗。徵拜長安縣令。威聲先路。不肅而理。鋌刃餘地。所投皆虛。擢同州刺史。圖歉於豐。量賑爲糴。號里倉者三百所。而凶年備矣。戒以暴骸。諭之速朽。成薄葬者九百家。而奢俗懲矣。群人有豪奪鄉悖。陰持吏失。朋搆訟獄。累政患之。公斷以尋斧。破其囊橐。人樂其殺。而法制行焉。郡城自禦寇之餘。復隍殆盡。朝貢所經。夷夏何仰。公悅使襁負。大興版築。下不知役。而扃固立焉。其餘則去思有碑。詳在篆述。可覆視也。朝議陟明。遷於陝服。封介晉楚。寄分函洛。而戎備不修。兵庫虛閉。公乃鳩工以利器。閱實以練卒。金革中度。義勇知方。既而有淮西之役。晨命暮具。凜然而可觀矣。河出城下。造舟爲梁。經費偁工。敗決相繼。公乃沉石而雙固中沚。省艦而三

分巨流。水與意會。勢若天成。既而有奔濤之沴。智勝功顯。終然而無害矣。其餘則三降璽書。就加爵秩。是明徵也。移疾入覲。貳職冬官。歸載不過圖書。留府盈乎粟帛。豐公約私。於是乎在。既至陳乞。以尚書致仕。室不交要路之賓。口不言當代之事。就陰委順。談者多之。公自解巾至於撤樂。思不逾矩。動無越思。以忠貞爲仕模。以勤儉爲家訓。身居侯邸。清節如初。男降王姬。素風愈勵。羈孤聚室。人各忘其亡。布褐分庭。士不知其貴。體溫柔而事至能斷。性坦易而物莫能窺。當官不務於名聲。所去必遺其功利。𪔐謠尚在。時論可徵。已逾書葬之期。謹舉易名之典。謹狀。元和三年四月日。故銀青光祿大夫守工部尚書致仕贈陝州大都督博陵崔公從外甥朝議郎行尚書司封員外郎上騎都尉賜緋魚袋呂溫謹上尚書考功。夫立身之道。始於君親。中於其人。終於其身。若府君者。居喪有聞。臨難